

摛藻堂四庫全書薈要

集部

欽定四庫全書叢要

集部

懷麓堂集卷十八至



詳校官候補通政司經歷臣郭祚熾

欽定四庫全書
懷麓堂集要卷一萬六千六百四十五

集部

懷麓堂集卷十六

明 李東陽 撰

詩稿十六

七言律詩

京都十景

瓊島春雲

瑤峯獨立倚空蒼雲去雲來雨不妨旋逐春寒生苑樹

更隨晴日度宮牆玉皇居處重樓擁太史占時五色光
若與山龍同作繪也須能補舜衣裳

太液清波

太液池頭春水生更無風雨卻宜晴鳥飛不動朱旛影
魚躍時驚綵柂聲天上銀河非舊路人間瀛海是虛名
何如周固開靈沼長與君王樂治平

居庸疊翠

劍戟森嚴虎豹蹲直從開闢見乾坤山連列郡趨東海

地擁層城壯北門萬里朔風須卻避千年王氣鎮長存
磨崖擬刻燕然頌聖德神功未易論

西山霽雪

雪後西山爽氣增凍雲消盡出凌嶒眼看萬壑徧一白
誰遣六月生層冰巖竇有泉渾欲滴石根無路轉愁登
飛樓縹渺空寒外幾度憑高興不勝

玉泉垂虹

玉泉東下轉逶迤百尺虹霓欲倒垂石罅正當山斷處

林光斜映雨晴時惟將遠色薰天淨不恨微涓到海遲
五老峯前纔一派可能消得謫仙詩

薊門烟樹

薊丘城外訪遺蹤樹色烟光遠更重飛雨過時青未了
落花殘處綠還濃路迷南郭將三里望斷西林有數峯
坐久不知遲日霽隔溪僧寺午時鐘

盧溝曉月

霜落桑乾水未枯曉空雲盡月輪孤一林燈影稀還見

十里川光澹欲無不斷鄰雞催短夢頻來征馬識長途
石欄橋上時翹首應傍清虛憶帝都

金臺夕照

往事虛傳郭隗宮荒臺半倚夕陽中迴光寂寂千山歛
落影蕭蕭萬樹空飛鳥亂隨天上下歸人競指路西東
黃金莫問招賢地一代衣冠此會同

南園秋風

別苑臨城輦路開天風昨夜起官槐秋隨萬馬嘶空至

曉送千旛拂地來落鴈遠驚雲外浦飛鷺欲下水邊臺
宸遊睿藻年年事況有長楊侍從才

東郊時雨

鳴鳩將雨過東林細草青郊望轉深潤入土膏春脉脉
暝含山色晝沈沈尋花問柳遊人興荷鋤扶犁墾老心
見說帝城多景物春晴未必勝春陰

次韻賀彭閣老先生二首

吏部銜清帶翰林路隨仙步轉高深人間別有登雲地

天下空勞仰斗心瀛海新波添夜雨玉堂喬木長春陰
歸來更覺門如水不受車塵半點侵

半生名行重儒林吏隱官曹歲月深文靖舊無旋馬地
敏中元有耐官心川原煖入三春雨殿閣涼分六月陰
欲效禹偁書院壁向來官序敢相侵

哭商懋衡侍講

科甲文章有父風詞林接武更誰同講經春殿爐烟煖
校藝秋闈燭影紅門闕並高緣有弟頭顱未白早稱翁

生年五十還非天不道人間是夢中

成化丙午五月十日東閣晚卧夢人以一男相
饋六月九日初度得男家報至閣中其事始驗

志喜二首

儼直金坡筆硯餘忽傳芳事滿庭除官曹尚憶占熊夢
仙島何曾礙鶴書三日兩孫翁獨喜舍弟溟亦得男四旬初度

我還如犀錢未作通家會織翠先過長者車

坐撫新雛一笑餘勝從臺省得新除閒門最陿堪旋馬

舊業雖貧尚有書貴賤人生真漫爾賢愚天意定何如
渠兄漸長資猶劣壯日誰牽服賈車

丙午順天府鹿鳴宴後有作

二十年前宴鹿鳴京闈何意此時衡官曹飽後心長怍
天語來時夢亦驚敢謂文章真妙選極知榮寵是虛名
賓筵既醉皆君德擬賦周詩竟不成

聞青谿學士擢禮部侍郎喜而有作

早將經濟許乾坤位入申年望已尊兩世北門專掌制

二卿南省載承恩

文僖公以學士擢禮侍青谿
寔此美二職今代所未有也

騰蛟地

迴雲俱化浴鳳池存水尚溫從此黃扉須更到講筵經

史待重論

大行皇帝輓歌辭三首

北闕南都象鵠豐我皇身自際時雍祇應龍種如高帝
何止虬髯似太宗艸木有情皆長養乾坤無地不包容
因思二十年前事長躡仙班侍九重

聖朝偃武脩文日共道王言似六經宋史重施新袞錢

孔庭增飾舊籩銅垂衣共仰升龍象賜墨皆成翥鳳形
回首茂陵松柏樹春來還向裕陵青

聖孝仁恩遍九埏由來至性本天全慈顏備極清寧養
帝號重歸景泰年斷獄法常寬斧鉞祀郊行不為遊畋
儒臣戀德兼哀病止望橋山幾泣然

祥後次方石謝先生見慰四首

三年血淚空啼我萬種愁心合語誰春夢不成飄苦睡
凍鬚多白豈闕詩孤雲遐水無歸處落木長風有靜時

南巷北鄰瞻望地底須喚隔是相思

除夕高堂每燕嬉悲來惟有骨先知
纏思白髮傷春至
敢惜紅顏與歲辭歸鶴不闋今古恨
乳鳥長戀死生私
多情得似無情好莫恠嬌兒太放癡

承歡未極早生悲已覺人間萬事微
三釜祿存嗟獨荷
百年身在憶全歸愁來別館春燈暗
戒後詩壇夜坐稀
不有青雲舊知己病軀無力定誰依

朱顏有信先驚老碧艸無情已報新
藥裏不消貧裏病

鄉山空復夢中春
欲尋流水難成調
怕聽啼雞又及辰
敢謂悲歌能當哭
歌成嗚咽轉愁人

次韻答方石先生齋居見寄

歲序驚心感雪霜
閉門終日類山房
不眠宣坐耽詩癖
縱去能為對客狂
西閣漏聲清夜隔
上林花意薄寒妨
雲霄舊侶勞相問
愧殺官曹兩月忙

再答方石

一卧空山歲幾霜
齋歌重聽漢芝房
應憐史局多清暇

誤悔詩壇作故狂春夢屢驚神獨往病懷真苦力相妨
無因載續陽春調柰有嬌兒乞字忙

再答

紫壇仙路隔烟霜縮地真無費長房身計祇應和霧隱
詩情敢作上天狂駐顏藥在心仍病折翼門高夢亦妨
最是丹丘無事鶴人間飜苦寄書忙

次青谿除夕韻

星奴無力送韓窮萬事都歸百感中病去祇應愁作伴

詩來真與檄爭功交游義重勞三益骨肉情深念五宗
花柳一春餘恨在盡判雙淚與東風

張進士鍊知舍山乞詩走筆贈此

張自稱知白之後

我病蕭然不出門河橋冠蓋正雲屯新詩寫贈聊隨俗
往事追思欲斷魂夜雨江頭千疊浪春山樹裏萬家村
河陽相業須珍重兩字箕裘不易論

次青谿歲暮拾享韻

殿頭風靜宿雲銷日送香烟上紫霄桃廟有靈歸拾祭

議曹無力預官寮千官珮鳥陪龍衮九奏笙歌合鳳韶
人道舜廷咨伯地舊將清直事唐堯

送陸武選丈量之浙江叅政

天上風雲擁俊豪海邊魚鳥識旌旄心懸紫禁千門月
氣壓層江百丈濤高論有人傳諫艸清時無事說兵曹
極知民社闢憂樂未放山川入醉毫

枉諸友先君墓次方石先生韻奉謝二首

荒郊無地不悲風廢堞西來古道東本為登堂勞范式

非關痛腹返橋公十年世事看今昨兩代交情識始終
賴有新詩題舊恨多愁聊可慰予窮

淚眼衝寒不受風出城先錯路西東地連村郭無三里
誼重存亡有數公寸草恩多身尚在蓼莪詩苦卷難終
須知盡日閒行意不為看雲到水窮

送吳亞卿道本省母漳州二首

地卿分職重東曹南望家山隔暮濤無計得歸寧免乞
有親能覲敢辭勞天風夜送飛帆急海日晴飈舞袖高

莫為倚門煩側席太平勲望屬時髦

與君交誼豈不久我少忽看青鬢華八千餘里暮山色
二十五回春杏花故人離思賦碧草仙母醉顏餐絳霞
誰道天河隔世界從知海客慣乘槎

春雪次韻方石

踏雪詩來起我眠雪清詩絕兩堪憐極知慰藉春深地
不似倉皇歲暮天間看紅塵非世界坐疑銀海眩山川
萬間廣廈真誰事昨夜先愁我屋顛

次方石先生春分懷先壠之作

永夜深悲輶笑歡夢回還復報晨餐間門少客猶多病
舊業無家漫有官四序槐榆頻改歲九原風雪倍愁寒
多情莫詠蘋蘩句白髮傷心和正難

心遠堂

晚向青油幕下歸宦遊不與意相違山林豈獨容高枕
塵土何曾着袞衣近海秋帆風力健遡空晴鶴羽毛稀
終南捷徑翻能近今昨誰堪校是非

清明前一日謁先宜人舊壠有述

遠從中歲憶兒童三十年前此送終四世死生同骨肉
兩原川陸限西東浮生過眼烟雲外舊事傷心含歎中
欲問九泉何處好鶴書迢遞若能通

送儲靜夫主事之南京吏部兼寄夏廷章

萬里晴空一鶴飛野雲溪雪避光輝不應銀海妨迴櫂
未許緇塵得上衣南國地誇山水麗東曹官愛簿書稀
多情定與吾鄉彥石假峯前詠落暉

章恭毅公輓詩

極知天下無難事聞道先朝有直臣萬死不輸三寸舌
一生誰是百年身英靈地已歸河嶽遺艸天應護鬼神
欲殉朱雲借時劙九原重斬負恩人

次韻答愧齋先生

歷歷星霜歲屢移病來雙鬢幾莖絲故人別久翻疑夢
往事心勞尚有期天上浮雲初變日江南芳艸未青時
祇應千里神交地不識人間是路岐

次青谿先生喜雨韻

河伯經春暫啟宮銀潢飛雨一時通城蕪盡濕疑含霧
園柳低垂不受風四墮年豐占卜史三壇神聽協歌工
儒臣獨病空無補賴有賢勞答聖衷

次韻方石哭靜逸先生

病起看春意屢新春來無事不傷神百年世路誰非客
四海交情幾是真館閣正須揮翰手山林兼少著書人
因君萬念涼如水亦欲滄江把釣綸

禪後述哀用祥韻四首

淒涼此日還非昨俯仰吾生欲藉誰盤旋有情慙屈建
江魚多恨老姜詩孤禽影弔曾棲地宿火灰餘未死時
莫向海天深處望海天空闊不勝思

膝前長記作兒嬉老去悲來不自知詩誦久荒毛氏業
魂招空效楚鄉辭禍能倚福須天定病得偷閒是我私
獨有無情雙白鬢不關人點與人癡

百身難贖兩年悲轉覺悲來病力微月落空堂驚夢短

艸青深院識春歸浮生跡在雲俱變客淚痕多雨似稀
應謝西涯舊時柳泣風愁雨共依依

庭花向晚寂無隣槁木經年猶有新屈子徒令惜往日
謫仙別自悲餘春烹魚饌筭竟誰事騎馬看花非我辰
故舊相逢莫趣駕閒居亦是素餐人

次韻答時雍

萬里長江日夜風故人消息苦難通十年人老俱頭白
千里書來會面同弱質瘦憐多病後餘情閒寄苦吟中

極知倦眼猶明在須向虞廷睹舜瞳

畫夢用舊韻

暮雨林臺花黯然愁人正愁相對眠夢疑空蝶有時化
兀如風舟不受牽江鄉亂草接天際鄰家短雞啼竹邊
偷閒習惰恐未可猶欲作官支俸錢

又用韻柬方石

溽暑中人如酒然空堂閉門各自眠君無俗客片紙入
我苦嬌兒雙袂牽莓苔古洞石巖際蘆荻釣磯秋水邊

振衣濯足兩不遂一枕清風千萬錢

重經天涯

城中風景夢中路病不出遊空有身柳條弄水色不定
鷗鳥傍沙情自親舊鄰十室九易主古寺百年長占春
慟哭兒童釣遊地白頭重到為何人

寄顧天錫

兩年三度吉州書一見佳兒更起予霄漢踈星辰落落
江湖幽夢晚蘧蘧吟詩性癖同心在聽訟堂空散吏如

獨有故人哀病後憶君清涕欲沾裾

遣兒兆先入學以詩示之

襁褓纔看卯角成儘將驕劣誤聰明要知西塾橫經地
不盡重闈屬纊情天意肯從吾敢負父書須讀汝休輕
烟樓撞破非能事我已無才浪得名

送衡州鄧同知

楚客遊吳幾盪胷又看衡嶽聳晴空東西南地蹤跡半
七十二峯疆域中郡刻有名隨薦鶚仙班無路接飛鴻

鄰邦亦欲沾河潤聽說陽城撫字功

承陸冶齋以詩趣出次韻答之

太行山下不勝思得似河陽駐馬時
環堵病回猶有我玉堂天上本無期
雲隨海鶴書來遠門掩春鐘夢覺遲
六館編摩諸老在敢將名姓託吾私

過城西高涼橋憶方石用所寄韻

每緣多病輒幽尋
暫駐城西水石陰
同賞竟孤前夜約
獨行無柰此時心
千山拂曉疑看畫
一雨經春不論金

猶有未忘情處在更無開口亦微吟

遊西山次韻答方石先生

未信仙家隔世寰直須風物盡戎蠻一時望眼東窮海
千里提封北據山光景竟輸三月暮官曹空負兩年閒
祇應他夜烟霄夢長在西林水石間

登華嚴上洞呈方石

振袂先登不受呼洞門高俯一浮圖吐吞雲霧成朝夕
指點江山入有無東去平蕪連野盡北來飛鳥背人孤

因逢海上仙翁說不羨天台與鴈湖

次韻楊維立侍讀館中見懷

每依紅日住長安瀛海東頭是大觀一代編年尊國史
六曹分局重天官同垂汗竹誇羣彥對掌絲綸見二難
曾向先朝分舊館壁間名姓老羞看予兩侍
史館

次韻寄題鏡川先生後樂園二首

藥欄花圃背堂開一日朝回幾度來范老心終念廊廟
寇公家不起樓臺海邊釣石鷗盟遠松下棋聲鶴夢回

多少舊題詩句在碧紗籠底認青苔

綠陰繁處小堂開野蝶園蜂自去來細草有情雙駐屐
遠山無數一登臺幽花生坐愛裁時滿俗客空教到後回
病起三年猶未賞短垣多雨長莓苔

重經慈恩寺憶張滄洲題瓈僧故廬

石橋飛步欲凌空百尺清陰九折通水底樓臺天上下
岸邊花柳路西東春題杏苑懷張籍畫卧廬山夢遠公
今日一杯還一曲獨吟孤酌與誰同

苦雨次韻方石五首

雨足街衢水到門
幾家兒女競罌盆
疑占石礎經時潤
夢駭雷車昨夜翻
河若可填烏敢避
日如能照大須奔
南鄰老伴非耽飲
直為愁多共酒樽

悲歌徹夜掩重門
急雨聲高應鼓盆
破屋有情看突兀
顛崖無力拔傾籬
街頭濁浪如山壅
天上行雲學馬奔
誤向北鄰招杜甫
不勝愁絕對空樽

時方石喪內

海中誰洩尾閭門
天上疑傾玉女盆
夸父力窮空競逐

商羊舞罷復飛翻議多鄰壑功難就戰退詩壇殿已奔
兩月內曹無寸補大官剛減病時樽

直下天潢是海門蛟龍何意復池盆身如斷梗沙邊泊
夢逐虛舟浪裏翻風伯縱靈應卻走月蛾空老更誰奔
鬱攸重作中宵崇欲效欒郎喚酒樽

時有
火薑

病掩愁城不出門直須牛飲阮家盆天瓢有底從教罄
屋瓦無情也任翻占憶田家今昔話喧勞鄰使往來奔
青絲白日空相送不得高歌共此樽

送崔指揮謙漕運還大河

滯雨濃雲黯不收漕歌聲動木蘭舟星稀禁闕天初霽
水落長淮地始秋國計已隨山共積歸心應與水爭流
山南後裔聲名在要識清朝有壯猶

寄哭王先達中書次方石韻

金華西下路崎危又闢齊山第一支乘化不隨玄鶴返
懷歸空與碧山期生前義重同心在身後囊空老僕知
極目關河飛旆遠為君惆悵立多時

重經天涯

渺渺平田水滿湖，早秋天氣雨晴初。
灘聲赴壑如相競，鳥影凌空半欲無。
未采蘋花憐寂寞，旋裁松樹見扶疎。
經過自與行吟約，未覺何顥此興孤。

社齋院署次前韻答方石

瀛海分明不受船，三山漫與十洲連。
鸞飛鶴散驚千里，月迥星踈共一天。
跡似杜陵休比浪，詩成曼碩自須憐。
玉堂槐影依稀在，獨坐吟燈思惘然。

索酒一首與方石

下馬呼童索酒忙，出門黃霧正茫茫。
應慙野興緣秋減，乍覺輕寒與病妨。
彭澤漫勞王宰送，新豐不學馬周狂。
亦知善戲非成虐，醉盞從來別有方。

重遊西涯次韻方石

流水平堤柳繞垣，重來又隔幾寒暄。
輕鷗似解隨人意，老馬猶能識寺門。
千載高情彭澤社，百年幽事杜陵村。
王郎亦有擣琴興，聊共清風石上尊。

懷麓堂集卷十六

欽定四庫全書 蘅要卷一 萬六千六百四十六 集部

懷麓堂集卷十七

明 李東陽 撰

詩稿十七

七言律詩

弘治己酉十月恭陪茂陵禪祭途次次韻答謝

方石贈別

萬里長空送遠颺
馬頭西向禁垣辭
鄭公聽履星俱下

列子乘虛氣可騎狂似山城吹帽客恍如塵海泛槎時
詩人莫訝天將雪雪後尋春更有詩

宿劉諫議祠用前韻

廟門高樹響靈颺直諫猶懷慷慨辭海內鳴陽希世有
仗前瘠馬任人騎江山盤礴堪與氣精爽分明夢覺時
千載腐儒憂國念為公三歎一題詩

望狄梁公祠用前韻

碧山西望遡流颶欲弔唐魂誦楚辭寄遠束芻誰與致

衝寒瘦馬不勝騎心懸晉嶺瞻雲地功在虞淵取日時
預擬明年寒食候莓苔壁上為留詩

宿西陵朝房用前韻

漢家陵壑動悲颼汾水經秋憶舊辭海上桑田春幾變
人間鐵馬夜還騎瞻疑日角臨朝地立似天門待漏時
山下擁裘寒不寐獨吟聊且罷聯詩

重謁茂陵用前韻

寢樹寒聲起夜颶載聞清廟有歌辭鼎湖已逐羣龍化

周馭空傳八駿騎千古山川神陟地三年祥禪禮成時
微臣亦抱劬勞恨萬事傷心忍賦詩

陵祀歸聞賜戴煖耳諸公有作再借前韻五首
烏紗巾上透涼颸一髮君恩力未辭賜煖宮貂同日戴
冒寒郊馬有人騎耳聞明主如緣詔心似窮民挾纊時
明向玉階還稽首羔羊重續退公詩

天上晴雲散煖颸曉霜先與賜貂辭宮墀正引千官拜
塞馬方懷賈客騎興豈龍山吹帽日恩同漢帝解衣時

瓊樓玉宇寒多少擬和新詞學進詩

輕盈弄日煖含飈短髮蒙茸亂不辭狐掩敝裘慙並價
馬驚寒影怯初騎寧同趙服隨胡制不似齊宮汙肉時
寄語春風莫吹郤多情長誦感恩詩

拂面寒生雪後颶十金貂價豈容辭鷄鷉紙解戎冠著
狐貉空隨獵馬騎禮重鄆人歌鼠日功多楊子拔毛時
君恩不與炎涼變欲和唐宮賜葛詩

午門晴旭颺輕颺拜領恩綸竟莫辭八座敢誇三珥貴

千金不羨五花騎休論孟德頭風事絕勝楊侯耳熱時

老去毛君猶未禿玉堂閒寫賜貂詩

尚矩還自南畿宿城西高氏園出訪而還次廉

伯韻一首

名園祇在寺垣西客袂無端此再攜鴉背夕陽天上下
馬頭晴雪路高低吟思謝氏池邊艸渴憶蘇郎醉後蘿
歲晚朝天應不遠不須愁滑向春泥

十一月朔喜雪次韻答周松露亞卿

卜歲何勞問大貞雪飛元不待嘉平未看麥應兩岐秀
且賞花開千樹瓊天向白時知夜盡地從消處見陽生
青綾被底餘寒在獨有懷人夢不成

西域貢獅將至有詔遣行人道郤之鳴治侍講
有述敬次來韻一首柬舜咨伯常二禮部

萬里迢迢初卻貢一時臺省共騰歡極知聖學從心始
誰道忠言逆耳難漢代謾誇龍是馬隋家空信鳥為鸞
非才敢作清朝頌獨和新詩寫寸丹

元日早朝

紫殿朱闌白玉坡天風吹樂下雲和城頭星斗知春早
苑外旌旗拂曙多龍集載看新歲紀鳳池初煖舊恩波
擬將無逸陳周戒只尺君門柰遠何

郊祀喜晴有述

碧烟消盡露華凝目極瑤壇第九層清珮緩隨馳道月
絳籠高應午門燈郊祀時樹大燈籠與正陽門燈相應風傳廣樂聲初下
天近燔柴氣已升人意可占神意悅萬年靈祚永堪膺

壽董圭峯六十二首

百尺圭峯勢入雲看君標格動人羣雄才捷可時揮翰
老眼明堪夜校文千載極星當闕見九霄清鶴傍城聞
長生會裏神仙客宴罷宮筵酒再醺

是日經筵

六袞纔臨未二毛置身元合在仙曹登科記有曾刊策
直講恩多舊賜袍陌上兒童知姓字館中年德讓耆髦
東夷不用詢安否親見先生壽骨高

董嘗使朝鮮

弘治庚戌三月十五日殿試讀卷東閣次都憲

屠公韻

閨闥門深紫殿春先朝舊典一時新文章妙極寰區選
陶冶同歸大造仁世有真祥非物寶天將吾道付儒紳
狀元忠孝何人是遙見爐香上玉宸

十七日文華殿讀卷次司馬馬公韻

龍虎榜中新得士鳳凰詔下正求才宮袍錦簇班初合
御筆紅批卷未開跪捧案香當此面步隨仙躅下中台
鑾坡兩度沾恩宴猶憶先皇舊賜杯

十八日聽傳臚有作

金蓮影與赭袍明華蓋前頭次第行黃紙數行丹詔字
鴻臚三唱甲科名雲邊曉日中天見夢裏春雷昨夜聲
歸向長安聽人語聖朝羅網盡豪英

十九日恩榮宴席上作

隊舞花簪送酒頻清朝盛事及嘉辰星辰晝下尚書履
風日晴宜進士巾圍撤漢科三日戰苑看唐樹九回春
丹心未老時頭白猶是當年獻策身

送張亞卿丈淵巡山海諸關

百二重關擁帝京大夫持節正東行風聲匝路旌旗繞
月影連山睥睨平秦策本無空萬里漢降能受紙三城
極知經濟吾儒事要使賢勞答聖情

送陸貢士答還常州

廉伯庶子之弟也

霜蹄歷塊蹠須驚可信青雲路未平楊意幾時能薦士
子由剛道不如兄花迷苑外愁中望艸入江南夢裏生
因憶晉陵親舊地送君非是道傍情

寄和愚得謝先生韻二首

樓高未許俗人來坐看風江雪浪類不受苦吟嘲飯顆
偶傳新賦出天台聽餘百鳥惟聞鳳閣盡千花始見梅
遠道壽公無一物願將碧海注金杯

蘭舟舊興久相違藜杖餘光得暫依二阮有情還共社
兩疏休恨不同歸漢宮直擁青綾被越調歌傳白苧衣
莫向江湖重回首故人天上曉星稀

礪庵為毛給事作

學得磨礪歲月深都將片石付分陰無瑕始見他山玉
有用終為大冶金轉覺工夫非舊步肯教圭角變初心
未論商鼎調羹事先進君王納誨歲

早朝露坐

七月涼生暑未徂似聞宮葉下高梧城頭急雨時來去
雲際踈星乍有無清漏水聲催玉箭絳籠燈影動金鋪
長安道渴知多少坐待天風一夜蘇

左時翊方伯輓詩

漫說仙壇有地靈早將塵滓濯清冷多才擬作梁園賦
好古親書漢石經駟馬門高歸興遶五羊城遠使車停
桂坡坡上懷人處月落梁空夢易醒

送閔都憲鎮兩廣

早聞新命出臺端多少都人夾道看五嶺以南惟此鎮
六鄉之外更何官風傳夜柝營門靜霜捲晴旛海氣寒
二十八年鵠鷺侶珮環聲裏聽和鸞

聞應寧遊西山以雨不果戲贈一首

時久旱

六載金山夢玉泉北來雙袖幾便旋杜陵雨怯期空負
赤壁風高興已仙濃愛午雲籠苑樹暗驚春浪打湖船
蒼頭也識蒼生意解為遊人一莞然

壽盧方伯廷佐

秣陵花竹卧新莊畫省薇垣舊夢長長有壽顏紅勝酒
儘教詩鬢白於霜一錢不用買明月萬事無如歸故鄉
欲采靈芝為公壽久知仙藥是家藏

盧有瑞芝

十月既望曾太僕席上見雪呈諸同年

十月長安見雪初舞風簾幕愛蕭疏寒欺燭影花相妬
淺映盃光玉不如五出未開應避汝二毛新點正慙予
同年會裏清時樂欲賦豐年興有餘

寄應寧提學用留別韻二首

天上詞垣近省闈十年毛羽愛追飛南池水煖鷗重化
西華風高鴈未歸絕足風塵須獨步初心道德肯相違
網羅剩有求才意未放山林老布衣

聲價曾傾翰墨林聖朝風教竟誰任冰霜故有回春力

梁棟應勞種樹心猶記籍分中秘久更無名謁外臺深
纔看白髮窺青鏡又逐離情上短簪

次嚴宗哲太守畱別韻兼寄應寧

宦轍南來萬里身二川西望入三秦從知太守多名士
更喜監司是故人滄海夜驚鯨力破碧霄晴指鳳毛新
他年記取畱詩別庭雪初回柳未春

體齋偶談舊譜出湘潭因取舊刻古潭私印為

贈并侑以詩

片石當年手自鏤姓名猶記古潭州老來悔作兒童戲
質在長含瓦礫羞郡邑舊分從遠譜文章新價託名流
鄉評世講吾人事傳語雲仍次第收

用前韻答曰會中書

寸鐵空勞兩字鏤天教完壁送鄰州喬遷漫有時哉歎
舊匱翻為待者羞李氏石無佳子弟蘇家山是假風流
極知伯仲文章貴應與詞林並價收

代石留別用前韻

純質親勞琢更鏤又隨筐篚過旁州相逢卻有搏沙恨
欲往先防見玉羞有玉 體齋家君義比金誰合斷我心非水
亦分流如聞翰苑將移篆予攝篆久體齋以新秩當受篆願與鈐封一
處收

青谿聞體齋古潭之說有詩見嘲次韻以解

奇事非關巧力鏤桑乾從古說并州登龍郤恨通家晚
獻璞翻為識者羞豈謂他山無片石誰能隻手斷長流
春曹不許書名籍別付詩壇掌故收

聖駕詣郊壇省牲喜晴次阮禮部韻二首

玉堂鈴索報新晴又向南郊候省牲照日山龍明有象
行空劍鳥迥無聲層城近識彤樓麗複道遙看羽蓋輕
誰道碧壇玄貺遠天心先格主心誠

九重宮殿一時晴帝帥千官視五牲獻瑞雲師朝送彩
避塵風伯夜無聲虎賁帳合龍旛繞羽士班聯鶴帔輕
應識感通非浪語駿奔何力助精誠

張亞卿文淵翟都憲廷瑞湯諭德維立領武官

誥艸事奉贈一首

曲池方檻綠周遭北闕回瞻象魏高臺省衣冠新接武
神仙官府自分曹書函御寶開紅玉酒出宮壺瀉碧濤
見說武階名藉重未妨精鑒入秋毫

送曹都憲出鎮薊州諸關

居庸東下接榆關千尺層城萬仞山秋有桑麻生事足
夜無烽火戍樓間帳前貔虎知嚴令歲晚風霜識壯顏
畧試一方經濟手歸來重補舊朝班

元日早朝

九門深掩禁城春
香霧籠街不動塵
玉帳寒更傳虎衛
彤樓曉色聽鷄人
簾前樂應紅燈起
階下班隨綵仗陳
朝散東華看霽日
午烟晴市一時新

孟春陪廟祀

闕角鐘鳴寢殿開
羽旗鱗甲繡成堆
班齊禁旅分行入
拜罷宮盤捧胙來
九廟神靈同日降
四時霜露及春回
廟街門外頻翹首
一道笙歌遙地雷

郊壇候駕

御座亭亭覆朵雲行宮佳氣正氤氳風旛繚繞空中降
午漏依稀閣外聞貴戚賜衣多錦繡內厨頒饌屏芳輦
齋堂向月懸清珮擬候瑤壇入夜分

郊壇分獻再得四瀆

宿氛銷盡夜無烟萬燎光長複道連陟降祥如水行地
裸將心與月當天羽衣道士通儀節白髮犧人說豆邉
猶記策名分獻日去年風景似今年

慶成宴有述

綵旗珠纛舞晴風香案前頭玉陛東天籟迥隨仙樂下
日華偏近御顏紅百年覆載生成後一代君臣禮意中
郊獻幾回分殿坐聖恩神貺兩難窮

送彭進士杰之南曹

幾年宦路說通家二仲風流世所誇去日獨吟池上艸
到時同醉寺前花芭蕉月冷春題字棠樹風清晚散衙
為報高堂消息近舊都元不是天涯

送周進士統知宿州

甲科文采重弓裘親見趨庭接宦遊坐愛簪袍能待客
去看冠蓋得分州宮前碧柳先春動河上清波帶雪流
共道中原風土勝向來凋疾待君瘳

送王公濟歸省

鶴薦南來勢入雲鶴行東下暫離羣江山別與詩相助
花柳濃將酒共醺親老祇應憐見面子才誰不愛為文
西堂八月清如水坐爇名香待令君

送伍主事符歸省

其父孟賢參政
予同年進士

畫省郎官着錦衣綠波晴漾綠帆飛天池水足鷗仍化
庭竹陰成鳳始歸魯史法應傳袞鉞宋科心不在輕肥
題詩為寄同年老有子如君眼底稀

送劉御史丙奉使歸省

楚山高不礙雲飛春日偏明繡芳衣人自烏臺持節下
天教白髮待兒歸新巢閣鳳還千仞舊種庭椿過十圍
極目滇南山盡處平安莫遣報書稀

送屠大理元勲錄刑福建

九寺官高重兩京北來冠蓋且南征清憐解橐留家地
老識登堂拜母情司馬晝遊非銜寵歐陽夜坐本求生
况逢紫鳳啣書日益覆須教仰大明

九橋書屋為京學陳教授作

八壺陰處九橋東水閣山樓面面通裁藥地餘經歲雨
讀書聲遍隔林風聘君名跡江湖外少宰文章感慨中
猶有弦歌遺業在誤疑家塾是饗宮

沈郎中尚倫母壽詩

白髮蕭然林下風壽筵芳事幾家同星朝婺女極當北
水繞秣陵江正東梅籠出林朝雨熟魚船入市晚潮通
鳳雛不假青鸞使自領天書出禁中

送董行人綏奉使交南

紫泥新詔出彤宮帝遣南乘使者驄四面樓船通海氣
九霄旌節下天風仙蓂萬葉占堯歷化日重輝仰舜瞳
聞道奉揚恩澤徧遠人無地不呼嵩

送茹知縣鑾

百里孤城枕太行
縣名元出古陶唐
清時政簡仍多稅
甲第才高不愧郎
天闕近應沾雨露
枳叢低豈礙鸞鳳
極知此去非長別
一曲離歌意許長

過真武廟懷朱文鳴亡友

淼淼滄波白鷺飛
苔痕長滿釣魚磯
松陰不改三珠樹
鶴夢還醒一羽衣
細數鄰家遺老盡
久懷同學故人稀
沿流不覺尋詩遠
把酒看花事事違

四月二十二日日講初罷柬體齋學士先生

三十年來兩月忙講筵猶飽大官羊聯班左掖天顏近
散直西堂雨氣涼紙謂積誠須感格敢言多暇得徜徉
詞垣老友箴規在未遣茅心一夜荒

送江主事澤之清江因東徐用和太守

淮上分司隅郡城舊遊茲復贈君行官非外補猶差遣
客不頻來少送迎莫倚名題金榜貴直將心付水曹清
多情為問山陽守種得甘棠幾樹成

送袁道士還任南京朝天宮

倪禮部內黨也

重來京國夢如昨再到冶亭山已秋頗覺烟霞非世外
誤迷花竹是江頭誰將載酒供新帳我有題名紀舊遊
應向青溪老仙客借騎輕鶴下瀛洲

賜枇杷

尚方珍果賜新嘗分得江南百顆黃遠道不妨經月暑
冷枝疑帶隔年霜龍箋帖罷名初散翠籠開時手亦香
歸領君恩薦家廟不禁清淚滿衣裳

送張以蒙知廬陵

兄裕夫為
江西參議

扁舟曾問吉州名二十餘年此送行山半有田皆地力
夜深無卷不書聲封疆正屬分符寄撫字真勞作縣情
明到大藩參謁罷不妨風雨話彭城

賜楊梅

官河催載滿船冰十月楊梅入帝京沁齒不知紅露濕
娥詩偏助玉堂清名從傅鼎遙分派價比隋珠亦稱情
再拜文華門外地講筵恩重若為榮

送衍聖公以某還曲阜

岱宗佳氣鬱崔巍
闕門高衆所歸一
道仙槎依歲轉
四山靈鳥避林飛
彤墀引罷新呈馬
寶篆沾餘舊賜衣
卻恨星軺常夜發
霜詩攜酒意多違

愚樂傳公嘗種松數百株
讀書其下有主松書院
在焉為作詩以遺其子若孫

舊時書屋長為主
手種青松間石根
卧擁白雲春下榻
到隨寒月夜開門
風霜閱歷無年歲
樽酒過逢有子孫

聞說大夫封已貴故枝新葉總沾恩

賜萬

祇向名花看畫圖忽驚仙骨在泥塗輕同握手雪愁先碎
細比餐冰聽卻無郭北芳菲懷故里江南風味憶西湖
渴塵此夜消應盡未羨金莖與玉壺

送柳拱之憲副之岷州兼柬應寧提學宗哲太

守

蜀雨秦雲萬里程賢勞還屬使君行山連舊鎮遙分省

勅換新官尚典兵味少漸知鹽酪美地寒偏覺毳裘輕
殊方卻喜同鄉話不負鷄壇下馬盟

林侍郎輓詩

廟堂風采重於山多在江南草木間一代循良須不愧
百年氣運恐相闊冰霜節苦天應識亥豕書存手自刪
莫道衣冠無廕澤聖朝恩命果重頒

寄壽翁羅郎中公給事中鑒之父時九十有三

矣

久從仙骨見鯢鮀又報春風壽域開滿眼兒孫纔一領
遶園松橘是重裁衣冠解說先朝事車馬飜無長者來
州里後生曾致祝十年詩札愧新裁

寄輓金陵陸廷玉

韋布居然古意存向來城市豈堪論門多剩地容山水
家有遺書付子孫遠道風塵違執繩舊時樓閣記開樽
江空歲晚情無限卻寄燕歌吊楚魂

于景瞻府尹壽詩

半生夷險路從容晚歲真於萬事慵京尹望高曾薦鶴
省郎官貴早乘龍秋添華髮將詩老春入酡顏映酒濃
湖海祇今耆舊少一身長對兩高峯

次韻匏菴聞王古直至之作

老來不記入京年舊事依稀屈指前身似野僧纔有髮
家如漁叟更無船祇愁別久今衰矣不覺詩成為艷然
春夜定知何處宿漫從新市買燈懸

送張兵馬考績還南京

石頭城闕路嵒峩南去長干十里遙野樹林疎寒映雪
官河水長暗生潮帆檣數點天空閼雞犬千家夜寂寥
三載一官初獻績幾人翹首望回軺

呂亞卿天章求詩壽其妹黃宜人時天章以使

歸

誰詠皇華入壽筵故家門闕尚依然扶衰試煮英公粥
念寡新分范氏田拂鏡飛霜秋漸滿開樽華月夜將圓
莫言老嫗光芒減曾見騰輝上九天

院中即事

硯冰呵墨印開封獨坐高簷落葉中籌唱有聲催短日
毫披無力禦長風羸驂向晚還思秣老鶴驚寒欲唳空
遙羨玉堂諸院長酒盃能綠火能紅

予嘗復書于屠都憲朝宗稱之為丹山先生蓋
謂其家四明有此山爾朝宗乃更其舊號以詩
謝予次韻奉答且以兩篆字贈之

弱毫誰道力如杠謾作丹山小篆雙千歲早占仙是骨

四明休說石為窓直須號令驚山嶽何止才名動浙江
况有烟霄天上曲楚歌從此不成腔

懷麓堂集卷十七

欽定四庫全書叢要卷一萬六千六百四十七 集部

懷麓堂集卷十八

明 李東陽 撰

詩稿十八

七言律詩

癸丑春闈試畢次韻知舉倪侍郎先生二首

公道如天望眼開片雲無地著羣猜千鈞用盡能辭力
萬木掄餘始見材枕為聽更寒自警門因看月夜頻推

虛慚淺薄持衡地十度懸科五度來

夜燈人靜不成眠親聽王褒頌得賢聖代文章真盛矣
少時情興轉飈然麟鳳徧藪原多瑞奎璧分宮亦並躔
南省東堂嘉話裏幾人同事復同年

陸貢士荃以伯兄治齋學士校藝春闈避不入
試將歸常州詩以送之

杏園花夢晚相迷又向東風駐馬蹄冶外有金元自躍
竹邊多鳳且分棲春光逐路生新草江水隨潮入舊溪

得失漫湏看目睫天留名姓榜前題

祈雨齋居

日日風霾夜夜陰小堂何地豁幽襟花遲別苑春全盡
井渴空鉢水更深玉署幾驚欹枕夢赤霄徒有望霓心
桑林禱罷仍翹首宵旰勤勞恐未禁

送進士歸省

眼見宮袍換錦衣偶從文字託光輝宵辭禁漏銅龍盡
曉散朝行白鷺稀千里馳驅才始見一生溫飽志全非

定湏不學長安孟紙向春風得意歸

寄莊定山

六峰東面一江橫此老逃名竟得名山屋到秋驚雨破
埜舟經日任潮生消愁物已盡中辦得意詩還枕上成
三十年前攜手地寺門斜月晚鐘聲

寄吉安顧太守天錫

天錫嘗為族祖希蓮先生修永新墓且刻遺集

百年交誼此何勤骨月誰教異姓分郡有殘編存故老
野多荒草認空墳山頭迥立千年表峽口寒封十丈雲

從此思君應不忘更披新刻見遺文

送楊志仁憲副之山東

歇馬長安坐曉涼憶君曾接舊鶴行北來宮殿千門月
東去關山滿路霜柳氏家傳唐訓法班生世有漢文章
竹林花徑經年別應向春宵夢玉堂

送馬員外金謫判廬江

春明門外報離筵忽為題詩意惘然暑去清風剛拂面
雨來新水欲勝船誰將白璧橫官道信有黃楊厄閏年

從此思親兼戀闕定依南斗望中天

送同年汪憲使希賢之貴州

汪嘗以希達府君遺墨見遺

憲節東來日未曛使輶西去復離羣佳期不負秋城雨
別思先停晚樹雲月裏虧盈天自定世間夷險路平分
故家遺墨勞珍贈愧乏千金可報君

次韻送李天瑞二首

莫問潮陽路幾千兩州山水鎮相連重來京國無知者
卻望江湖更渺然賈傅少能為世計後山貧不受人憐

雲霄剩有回翔地北雁南鴻又一年

兩疏金門一月餘使裝重檢舊圖書亦知廊廟心仍在
奈有山林癖未除戒酒不從花底醉愛舟多在水中居
禁林風雪懷人夜已覺輕寒薄綺疏

送薛吉士給養病

十五年中兩校文多才頻見出人羣金門漏永平明入
玉署書聲半夜聞別夢幾回欹枕月歸心一片渡江雲
須知館閣儲賢地可見詞章是策勲

雪夜追次坡翁韻四首

物華隨地斂穠纖始識玄冥號令嚴祗樹未春花作雨
解池初夜水生鹽粧疑淡掃時窺鏡舞恨低飛不過簷
謾向蒼生占喜色凍愁先到兩眉尖

放朝聲裏散晨鴉閒取詩題賦雪車陸海平飄千頃浪
江梅亂落滿城花幾人標格如江令何處交情有戴家
不盡高樓看爽氣凝尋樵跡認山義

賦形隨意極毫纖白戰壇空未解嚴過眼幻疑看石髓

入茶清不讓羹鹽紅塵舊夢迷香陌白屋新愁擁破簷
卻望五門天上峙登高無路擬城尖

凍雲飛盡北臺鴉曾辱東坡小駐車頰水聚星他夜戰
玉堂微霰幾回花孤吟信可成詩案險句爭傳出道家
絕勝江南無雪地斜陽空立路三義

正月四日受郊戒復陪廟享是日飲福受胙皆

免

曉聽綸音出殿東午陪親祀入神宮齋期已先庚三日

輦路遙清異二風禮異冠裳隨地改望高宗廟與天通
恭聞飲福新停解精意同歸陟降中

郊祀賜文綺有述

金吾衛士夜催朝門外承恩賜錦袍裁就巧隨宮漏盡
拜時紅近朵雲高須知左右齋明地不負東南貢篚勞
經幄史臣頻荷寵駿奔今日愧重遭

正月七日郊壇分獻得山川

山川羣祀一壇分複道東來萬燎熏盡有精靈裨海嶽

豈無功澤比風雲禮當人目天湏應制出令王古亦聞
從此八方歸禹奠願將微意託餘芬

送侍讀學士曾士美之南京

薦章頻見出文淵重上春風建業船官好舊銜加兩字
書成新史又三年西江使客多鄉信北院移文祇俸錢
莫道鳳樓閒老手要看詞賦滿山川

屠都憲朝宗宅東諸同席屠所居予

諸曹冠蓋簇成雲上席叨承禮不羣舊屋有知應笑我

高堂多慶已慙君大牢胙美頌時薦南曲聲高醉後聞
橋梓一門春色裏栢臺餘蔭許同分

屏風燈青谿先生席上作

真於剪刻露天機暗處生明識者稀春步轉迷絲作障
夜遊翻訝錦為衣曾聞雲母分班坐頗記金蓮出殿歸
同是玉堂年少客晚從東壁借餘輝

戴松崖亞卿席上觀屏風燈用青谿宅韻

丹青組織不同機製出方燈樣轉稀熾炭煖回雕玉地

繡雲暗動紫烟衣嬌兒解事憐春賞醉客多情惜夜歸

莫向東曹誇步障有人持錦闕光輝

上元後十日會治齋觀梅值雪限韻二首

有約移尊玉署東小梅疎雪賞心同輕颺晚色還隨袖
淺著春寒未滿叢娛客漫湏琴有調催詩卻笑雨無功
休論臘日三回白且勝元宵萬點紅

片雪斜飄別院東此花風致偶能同飛從貝闕三千丈
占慣春風第一叢剪刻似經詞客賦栽培多荷主人功

相逢欲鬪空明色正對金杯臘酒紅

篁墩先生奉命同教吉士有詩見貽次韻奉答

詞林盛事久相仍師席逢君喜不勝文望斗高人正仰
誨言珍重我先承清班白玉墀頭地舊業青藜杖裏燈
同是感恩思效日直從鄉榜記賓興

篁墩同壬
午秋試

次丹山屠都憲韻

暖風晴雪散瑤天又向朝回宴集賢碧樹春陰高比蓋
玉堂冰溜大於椽規程永樂千年制庶吉士之選前甲申最盛衣鉢

文安兩派傳子拔選時呆齋劉先生奉剛道陽春無和
者丹山山上有詩仙

再用韻自述二首

列宿光分共一天姓名先後託羣賢清風重檢書千卷
舊業曾占屋數椽聖代渥恩慚我負詞林故事許人傳
欲將勤苦酬清逸又被官曹說地仙

中年進學似登天轉覺文章畏後賢悔送隙光飛過鳥
記裁堂樹小如椽科場次第門生出教旨丁寧閣老傳

眼底功名非實地任誇千佛與羣仙

送許吉士天錫養病

一點文星傍紫微士林方此佇光輝工詩不為唐科選
卧病非同漢令歸舊友愛聽談玉署老親驚見著朝衣
文場講席周旋地道義重來幸不違

體齋先生壽六十

傍人不信已稱翁祇愛朱顏點碧瞳一紀壽高先過我
六曹名重幾如公賓筵酒熟春初半使節山回日正中

莫訝多情頻致祝老來向止說三同

予嘗有三
同詩贈

中元送篁墩先生謁陵

暫辭經幄下山郵
獨愧官曹有去留
天上羣仙歸袖領
月中諸帝相神遊
雲深輦路蒼厓合
風落離宮錦樹秋
試問未安新學舍
舊名曾護碧紗不

寄答李白洲憲長

聞其體肥
過昔數倍

海北天南氣鬱蒸
置身如在玉壺冰
壯心不分緣詩瘦
老手兼誇作吏能
買地燒墟山有業
寄書寥廓雁無憑

多情省樹休勞問歲月空慚雨露仍

送王德潤參政還河南

其子崇文亦予禮部所舉士

星朝初下紫微垣不為多情豈贈言兩世科名看放榜
一時冠蓋送歸藩庭前槐老陰重合江上棠成樹已繁
還向耆民宣聖德萬人扶杖繞行軒

送盛郎中洪歸省崑山

省郎飛步躡仙梯駟馬門高綽楔低春煖舊山多玉種
歲寒芳樹有鸞棲封章一一題名字歸夢時時繞路蹊

今日聖恩教暫去望君長傍五雲西

天津八景

拱北遙岑

百尺高樓拱帝廷
北山秋望入空冥
太行西帶城烟碧
碣石東連海樹青
吟客放懷朝柱笏
使遊翹首夜占星
監司正屬理輪地
一夜朝天夢幾醒

鎮東晴旭

五夜城頭聽早雞
海東紅日上雲梯
飛鳥曉颺朱簾影

舞燕晴翻畫棟泥千里帆檣天遠近萬家村市屋高低
客來不用愁風雨無數風光入品題

安西烟樹

安西門外碧參差綠樹層烟曉更宜縹渺不知天盡處
霏微疑是雨來時林間暝色聞鐘杳野外寒光見日遲
睡起鈎簾看午霽一川花鳥正離離

定南禾風

屑軒南向坐薰風極目平疇遠近同萬里黃雲吹不斷

一天翠浪卷還空阜財正藉驅煩力飽士新成偃武功
殿閣微涼天上句擬將餘興續坡翁

吳粳萬艘

長江西上接天津萬艦吳粳入貢新漕卒肅風前後應
萬師乘月往來頻千年國計須民力百里山靈護水神
結銓古來先甸服萬方無處不堯仁

天驥連營

危闌一曲俯平川萬驥聯營下九天沙地雨肥青苜蓿

日華晴散錦連錢使充枉作開邊計歸華真傳定鼎年
白髮奚官無一事太平天子罷遊畋

百步平潮

海門晴雪浸金鰲日道沾來湧暗濤望極遠空知岸闊
卧欹殘夢覺船高遙疑夢澤相吞吐不似胥江枉怒號
時有海舟隨下上往來沙口不辭勞

海門夜月

海門東望極空明月裏山河影乍晴萬里滄波天一色

數聲靈賴夜三更水精宮闕魚龍冷白玉城高鶴鶴輕
不用扁舟泛寥廓且看奇絕盡平生

七言排律

徐州新洪詩有序

洪舊名百步洪水峻石險自古為然工部郭昇
騰霄鑿石平岸厥功告成請以是詩刻之石

山根忽斷水橫來誰見當時禹鑿開此地獨當南北險
濟川多難古今哀叢叢怒石迎船起拍拍驚濤打岸迴

繩卒不眠愁上下蒿師無力正摧頽千年鬼斧遺天巧
百里山靈伏禍胎已仗中朝天子命兼煩東省使君才
沙沈鐵鎖蛟龍避霞鑽雷車晝夜催直到中流無阻隔
却看高浪失崔嵬寒泉出梵人爭引垂柳邊河手自栽
賈客不須虞覆溺渴夫終免卧蒿萊岩收傅築功難繼
海著秦驅事可猜莫置豐碑芳草處恐教文字沒蒼苔

送梁廷美黃門之陝西叅政

秦中天府舊金湯聖代提封寄一方西土地連沙漠盡

北來城帶海山長分符望重諸侯伯參政官煩給舍郎
關塞五年三出將閭閻多事屢經荒隨車少婦勞牽輓
失穴餘充尚陸梁共倚紆謀裨社稷早聞憂國有封章
芝蘭莫遣蒙蕭艾貔虎終教制犬羊充國屯田長在漢
士安租調總歸唐朝廷拔擢君何忝朋輩交遊我未忘
離別此時無限意酒酣分手脫絲韁

與時用陪士常話別聯句翌日士常見和因登

前韻

客去蕭然卧北窓興來誰復到餘缸鐘聲坐覺催寒漏
燈影長憐伴夜缸徐榻正懸懷舊侶郢詞初變憶新腔
憂時每念丹心獨抗世寧教白眼雙敢謂文章非忝竊
未看民俗盡敦龐名場有繼身仍繫宦海無風浪亦撞
交重雷陳真不減才非元白已全降孤藤幸託千年樹
一葦終期萬里江望裏停雲心脉脉曲中流水恨淙淙
還家莫歎關山隔聞說絃歌似魯邦

再叠前韻送士常

亂葉回飈坐打窓幾時清話擁寒缸
歸期好趁殘冬雪離思先縈昨夜釭
鄉樹影稀遙辯色胡笳聲斷不聞腔
重岡路折羊腸九尺紙書回雁足雙南
望闕山真設險北來風土舊含龐詞爭
趙韻錐全脫氣壓增門斗易撞人傑有
靈君不忝交遊無用我先降秋風驥裏將
辭市春水芙蓉正憶江西壁可容窺末照
東流從此識歸淙千金學得屠龍技未遣
青袍滯一邦

寄題松江曹封君屏山別業

刑部員外郎時中之父

江上山圍碧玉屏九峰深處一峰青風低桂子香垂屋
水足桃花浪擁汀謝傅園中開別墅司空谷裏見新銘
曹嘗自壽藏蘭橈力短歌仍緩鶴氅寒多酒易醒月滿舊遊
隨夜燭日高幽夢繞晨扁行時載藥非因市靜裏占蓍
或有靈月旦里評勞袞鉞春秋鄉燕仰儀刑傳家剩有
樊侯漆教子親將伏氏經名自中朝天子命身為南極
老人星山中吏隱從來別不似揚雄舊草亭

無塵舫

瀟灑城西屋數椽端居長在木蘭船東華塵土翻疑夢
南國江湖別有天燈火對床懷夜泊巖巒欹枕憶朝眠
囊空剩有圖書載地僻都忘里巷連明月在庭知浪靜
遠山移坐覺風偏行隨樹影如開繩坐扣闌干却代舷
歐老再逢須作記李膺如到合登仙吳橋宛對霜中宿
剡水真從雪後還聖世已無浮海念高情誰和濯纓篇
萬間廣廈何由見見說君才好濟川

題青巖隱居記後

青巖者王忠文公子充讀書之所也公為翰林待制死事

雲南後若干年其曾孫汶舉進士持青巖圖示予公所為記義門鄭長史楷所書公伯子

綏之詩與仲子紳之文皆在焉

青巖西面接嶙峋間道先生舊隱淪二水夾流通澗谷兩山高起隔風塵唐川地古猶稱越

唐有華川縣廢元公始號華川

世兵餘合避秦公

隱在墅至正年

似羊曇非乞舅

記云依外家傅氏而居

居緣孟母不求鄰長懷龍卧歌梁父豈學羊裘老富春書詔早傳行在所

天兵至婺首以微見

衣冠生及太平辰記言

右史親沾命

公嘗為起居注

仗節南荒竟委身白髮鄭公鄉里

在青槐王氏子孫貧家聲六代科名出國典先朝謚法
新公謚在正統間今日醉鄉還有記當時嵩嶽豈無神曾披汗
竹開金匱擬束生芻弔玉人遺像雅篇俱在眼斗山瞻
望敢辭頻

城塘書屋為邵吏部日昭作

陽羨峰高荆水深草堂風物靜蕭森層軒不礙浮雲色
曲徑遙通野岸尋自引溪泉教作澗旋移隣竹看成林
憐花肯信兒童折愛樹時防鹿豕侵身在儘餘容膝地

囊空頻散買書金門無俗客城中駕坐有清風石上琴
仰止高山誰獨步茫然空谷有餘音卦探羲氏陰陽畫
詩和堯夫首尾吟臺省正逢推轂日江湖空憶挂帆心
王郎舊業今何有十載庭槐滿地陰

黎滄隱觀趣樓

龍峰峰下俯江流上有元龍百尺樓疊嶂遠從巴樹擁
巨濤平蹙楚天浮芳村花柳春風遍晚歲桑麻暮雨收
汀鳥下時雲片片渚鱗行處水悠悠樵歌出徑遙通谷

釣舸迴溪却繫洲或有幽人來問字更無豪客為停駒
陶園未涉先成趣蘿酒多藏不待謀達士豈知名教樂
大官終有廟廊憂百年天地容吾老千里江山憶此遊
忽省故園迷處所鑑湖東畔瀼西頭

鏡川楊先生宅賞蓮得蕖字

不駕城東款段車偶來池上看芙蓉盈盈素質秋波外
濯濯紅香夜雨餘照影宮粧新入鏡遡風仙步欲凌虛
誰言畫手工能貌自笑酡顏醉不如二女江頭席染茜

六郎天上錦為裾恥將脂粉同傾國却有文章為起予
太華峰高唐客詠若耶溪近越人居身閒與世論清濁
心在隨時作卷舒幾日物華驚又變百年情賞幸相於
留連不覺詩成晚起向金蓮燭下書

雪和佩之韻上元後一日

天風吹雪下鰲山天上仙郎白玉顏雲母屏風春卷幔
水精宮闕夜開闢光疑素月鴉初動路繞層空鶴乍還
冰溜墮簷真欲滴風花滿樹若為攀詩才絕妙君堪比

酒價從高我未憚淨掃柴門無好客草堂幽處不勝閒

雪不止疊前韻

漫將春雪比冰山日薄風稀漸改顏怯勢已銷紅獸炭
欣貧猶擁舊柴關無情竟作凌空去作態猶能拂袖還
積淖有時妨跋涉乘危何力任躋攀人情自覺多時厭
世事長於好處惺莫怪雲師大驅遂向來贏得一冬閒

長至杞陵紀行

九重霜露重三時盛代官曹有令儀南陸正回羲馭晷

北軺仍遣漢陵祠身辭左掖爐烟裏路出西郊野水渭
已少游塵輕撲面更無飛雪亂侵肌居民小市多新集
勝國荒城祗斷基耕罷疲牛驅再作蹶餘羸馬墜還騎
徧觀禾圃知秋熟稍憩茆簷覺午移別苑場空猶苜蓿
孤村樹老自棠梨因過古渡傷心切為送停雲駐足遲
歲晚萍蹤懷故侶境偏芹館赴幽期詞林舊邸經年在
諫議高名後世遺莫厭車裝頻去住載看堂構幾興衰
松風入夢長驚枕槐月窺人直到帷絳帳廣文停夜酌

白頭老將具晨炊傳教騎隸齊迴節逢著樵夫屢問岐
高歷翠微時縹缈俯穿青逕轉逶迤千尋紫殿琉璃合
百尺銀橋蟠竦危暗昧敢忘遽暖禮寂寥深感杜陵悲
神宮久闕仙遊跡御製親題聖德碑龍脈蜿蜒岡勢繞
獸形猙猛石工奇山腰列雉圍成郭巖寶諸泉匯作池
廬宿坐殘紅梢枯屐登梯盡碧參差中官啓戶鳴金磬
都尉升階奠玉卮林迴側聞豺兕靜天低下闕斗星垂
光遙燿火依稀見氣隱葭灰次第吹虎拜憶從三舞踏

駿奔甘效獨驅馳行囊競與歸途急旅榻真於睡思宜
霽景忽開雙倦眼閒情或上兩顰眉黃樓作賦思攜客
紫塞論兵念守夷珠刹富填捐施主土墻貧擁負暄兒
香濃蟻甕聊供醉寒近貂裘竟不知每愧謀猷裨獻納
僅將筋力付娛嬉朝趨未報鳬飛信庭覲先陳鯉退詩
二紀茲行令十度春寒風物合分誰

送董生天錫歸寧都

瀟灑詞垣玉樹風夜堂烟暑坐來空未論聳壑過房相

且賞清談似阿戎別苑芳茗鳴翡翠舊巢歸鳳識梧桐
庭趨正在聞詩後雲望翻於駐馬中少日方言諳薊北
去時鄉夢隔湖東衡廬地遠千峰接章貢城分二水通
故老見須驚艸弁大人去尚憶羆熊標梅實在星垂戶
林桂花開月滿宮報得泥金非浪語奪回標錦是奇功
通家屢辱常相拜先為題詩賀若翁



懷麓堂集卷十八



總校官庶吉士臣張能照
校對官編修臣龔大萬
謄錄監生臣樊少巨
謄錄貢生臣左顥若